

**Uunga siunnersuut: Aatsitassat pillugit ingerlatallu tamatumunnga pingaarutillit  
pillugit Inatsisartut inatsisaata (aatsitassanut ikummatissanullu inatsit)  
allanngortinneqarnera pillugu Inatsisartut inatsisaat**  
*Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut  
Naligiissitaanermullu Naalakkersuisumit saqqummiunneqartoq*

**aamma**

**Aatsitassanut tunngasunik suliaqarnek pillugu Inatsisartut inatsisaata  
allanngortinneqarnera pillugu Inatsisartut inatsisaat**  
*Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut  
Naligiissitaanermullu Naalakkersuisumit saqqummiunneqartoq*

**pillugit**

**Inuussutissarsiornermut Aatsitassanullu Ataatsimiititaliap siunnersuutit  
aappassaaneerneqarnissaannut**

**ISUMALIUTISSIISUTAA**

Ataatsimiititaliap sulianik suliarinninnermini ilaasortarai:

Inatsisartunut ilaasortaq Mariane Paviasen Jensen, Inuit Ataqatigiit, siulittaasoq  
Inatsisartunut ilaasortaq Juno Berthelsen, Naleraq, siulittaasup tullia  
Inatsisartunut ilaasortaq Hans-Erik Enoksen, Demokraatit  
Inatsisartunut ilaasortaq Lars Poulsen, Siumut  
Inatsisartunut ilaasortaq, Aqqalu C. Jerimiassen, Atassut

UKA2025-mi 23. oktober 2025-mi siullermeerinninnerup kingorna siunnersuutit  
ataatsimiititaliamit misissorneqarput.

**Siunnersuutit imarisai siunertaalu**

Siunertaq

Aatsitassanut suliaasaqarfiup eqaannerusumik ingerlatsinissamut  
ajornannginnerulersitsinissamullu immikkoortut 23 aamma 24 inatsisissatut siunnersuutini  
siunertarineqarpoq, Aatsitassanut Ikummatissanullu Aqutsisoqarfiup aamma Avatangiisinut  
Aqutsisoqarfiup Aatsitassanut Aqutsisoqarfiup ataaniittumit (Avatangiisinut Aqutsisoqarfik)  
piumasaqaataasunit inatsimmi aalajangersakkanik paaanikkut ataannarnissaat  
siunertarineqarpoq. Aatsitassat pillugit ingerlatallu tamatumunnga pingaarutillit pillugit

Inatsisartut inatsisaanni (aatsitassanut ikummatissanullu inatsit) aamma aatsitassanut tunngasunik suliaqarneq pillugu Inatsisartut inatsisaanni (aatsitassanut tunngasunik suliaqarnermik inatsit) immikkoortut ataatsimut suliarineqarput.

Aqutsisoqarfiup ataannarnissaanut siunertamut ataatsimut, imaluunniit nutaanik pilersitsisoqaraluarpat allannguutaasut akornusiinaviangillat. Aqutsisoqarfik inatsisiliornikkut aalajangersagaajunnaassaaq.

#### Aatsitassanut Ikummatissanullu Aqutsisoqarfimmut tunngatillugu

Aatsitassanut ikummatissanullu aalajangersakkami aamma Aatsitassanut tunngasunik suliaqarnermut inatsimmi aningaasanut inatsit 2025 malillugu pissutsinut toqqaannartumik naleqqussarneqarsimagaluartut, aalajangersakkat Aatsitassanut Ikummatissanullu Aqutsisoqarfimmut tunngasut aningaasanut inatsit 2025-mi aaqqissuussanermut Aatsitassanullu Aqutsisoqarfimmiup atorunnaarsinneqarnissaanik allanngortitsinissamut periarfissiipput. Siunnersuutini allannguutit taakku piviusunnngortinneqassapput ataavartussannngortinneqassallutillu.

#### Avatangiisinut Aqutsisoqarfimmut tunngatillugu

Avatangiisinut Aqutsisoqarfiup pinngortitamut avatangiisinullu tunngasut aatsitassarsiornerup iluaniittut suliarai, taamaattumillu arlaqartunik tunngaviusunik piginnaatitsissuteqarmata annaaneqartariaqangitsut, Avatangiisinut Aqutsisoqarfik atorunnaarsinneqassagaluarpat aamma pineqartup aqunneqarnerata allanngortinnissaa toqparneqassagaluarpalluunniit.

Taamaattumik siunnersuut aalajangersakkanik imaattunik imaqarpoq:

- Naalackersuinikkut akuliuttannginnissamik tunngaviup aalajangiusimaannarnissaa Naalackersuisut naapertorlugit isumaqarpoq, suliaqarfimmut tunngatillugu oqartussaasut suliarinninnerat suliap sinnerata suliarineqarneranut attuumassuteqassanngitsoq. Tassa imatut oqaatigalugu ulluinnarni pinngortitamut avatangiisinullu tunngasut pillugit suliaqarnerup naalackersuisoqarfimmit ataatsimit ingerlanneqassanngitsoq imaluunniit naalackersuisoqarfiup ataani immikkoortumit ingerlanneqassanngitsoq, siunnersuummi § 3 a, imm. 1 aatsitassanut suliaqarfimmi pissutsit allat pillugit suliaqarneq naapertorlugu.
- Suliffissuaqarnermut attuumassuteqanngitsut pillugit siunnersuummi § § 3 a, imm. 2 naapertorlugu pinngortitamut avatangiisinullu tunngasut pillugit nalilersuinerit aalajangiinerillu, ilisimatuussutsikkut sullissivimmit arlaannaannulluunniit attuumassuteqanngitsumut ataatsimit arlalinnilluunniit aalajangiinissanut nalilersuinermik missingiutinillu aallaaveqartinneqassapput.

- Pinngortitamut avatangiisinullu tunngasut pillugit aalajangiinerit naammagittaalliuutigineqarsinnaanerit pillugu aalajangersakkat attatiinnarneqarnissaat siunnersuut § § 3 b naapertorlugu periarfissaavoq.

### Pissutsit allat

Oqartussaasunit suliarinninnermi tunngaviatigut ataatsimut (tunngavisoq one door) ingerlateqqinneqarpoq. Inatsisitigut toqqakkamik oqartussaaffik taarsiullugu Naalakkersuisut immikkoortortaqarfimmik toqqaanissaat, taakku allaffissornikkut aatsitassanut immikkoortortaqarfimmi pissutinnut piginnittussaanermillu pigisaqartunut allanullu aatsitassanut tunngasunik suliaqarnermut inatsimmi aamma aatsitassanut inatsimmi pineqartunut oqaloqatiginnittarnerit ingerlanneqartarnissaat siunnersuutigineqarpoq.

Aatsitassanut tunngasunik suliaqarnek pillugu inatsimmi allannguutissatut siunnersuut (imm. 24) kukkusumik innersuussisimanermit teknikikkut naqqiissuteqarnermik aamma imaqarpoq.

### **Inatsisartuni siullermeerinninneq**

Siunnersuutit ataatsimut isigalugit tigulluarneqarput immikkoortullu Inuussutissarsiornermut Aatsitassanullu Ataatsimiititaliamit suliarineqartussanngorlugit innersuussutigineqarlutik.

Allaffissornerup oqilisaaffigineqarnissaa sivikinnerusumillu sullissinissamut aqutissat anguniarneqarnerat siullermeerinninnermi Inatsisartunit taparserneqartut oqariartuutigineqarpoq. Siunnersuummi isumalluutitut tunngatillugu kingunerisassat pillugit paasissutissanik aamma ujartuisoqarpoq. Najoqqutassanik ersarinnerusunik tassuunakkullu naammagittaalliutit qanoq suliarineqartarnissaat avatangiisinut aqutsisoqarfik matuneqassagaluarpat aamma apeqquutigineqarpoq.

Taamaattoq siunnersuutini ilaatigut naammagittaalliorsinnaaneq peerneqarmat qitiusumullu inissinneqarnera isornartorsiorneqarpoq, Naalakkersuisullu ilumut aatsitassanik piiaarusunnertut tassunga atatillugu apeqquuserneqarluni.

### **Tusarniaanermi akissuteqaatit**

Siunnersuutit tamanut ammasumik tusarniaassutigineqarput piffissami 2. juli 2025-miit 30. juli 2025-p tungaanut.

Inatsisartuni Siulittaasoqarfimmit ilusiliinissamut piumasaqaatit allatorneqarsimasut malillugit tusarniaanermi akissutit inatsisissatut siunnersuummut ilanngunneqarput.

### Tusarniaasimanermit najoqqutarineqartut pillugit ataatsimiititaliap oqaaseqatai

Tusarniaanermiit nalunaarsorneqarsimasoq naapertorlugu “[o]qaaseqaatit tiguneqarsimasut naalisarlugit tunniunneqarsimanerat” ataatsimiititaliap maluginiarpa. Tusarniaanermi

akissutitut tatiginartumik nassuiaateqaraanni taama suleriaaseqarneq akornutissaqanngilaq. Taamaattorli tusarniaanermiit oqaasertaliunneqarsimasut eqqunngitsumik allassimaneri ataatsimiititaliamit uparuarneqarput “[u]ku tulluittut oqaaseqaateqarsimangillat: GreenRoc Strategic Materials Plc [...]”, tusarniaanermummi GreenRoc Strategic Materials Plc-imit akissummi ima allassimammat [q]ujanaq inatsisissatut siunnersuummut tusarniaanermut periarfissinneqaratta. GreenRoc Strategic Materials Plc oqaaseqaateqanngilaq, taamaallaalli naammagittaalliorsinnaanermut periarfissap pingaaruteqassusaa tikkuarlugu.”

Inuussutissarsiornermut, Aatsitassanut, Nukissiutitut, Inatsisinut Atuutsitsinermit Naligiissitaanermullu Naalackersuisoqarfiup allannguutissatut siunnersuummi ernumassutaasinnaasut takoreerlugit iluarsisimagaa ataatsimiititaliap iluarisimaarpaa, soorlu Transparency International Greenlandimit (TIG) tusarniaanermi akissummi ima allassimasut:

”Avatangiisinut Aqutsisoqarfiup Naalackersuisup siunissami siulittaasussaannit matussallugu aalajangerneqassagaluarpat, uani avatangiisinut aqutsisoqarfiup allanut maleruunna ilanngullugu, taava missingiummi kingunerisassaasa aalajangiiffigineqarnissaat pillugu TIG-ip taakku tunngavilersuutigalugit maqaasisaqqarpoq. TIG-ip taamaattumik innersuussutigaa, siunissami aatsitassanut aqutsisoqarfiup atorunnaarsinneqarnissaa pillugu periarfissamik kissaateqartoqassagaluarpat, taava minnerpaamik nalunaarummik sanasoqassaaq.”

Inuussutissarsiornermut, Aatsitassanut, Nukissiutitut, Inatsisinut Atuutsitsinermit Naligiissitaanermullu Naalackersuisoqarfiup tassunga atatillugu allappaa:

”Aatsitassanut Suliassaqqarfinnut Avatangiisinut Aqutsisoqarfiup atorunnaarsinneqarsinnaanerata ernumassutigineqarnera siullermik pingaarnertullu naalackersuinikkut akuliutinnginnissamut tunngaviummut, suliassaqqarfimmu tunngatillugu oqartussap sularinninnera suliassanik sularinninnermut allanut attuumassuteqanngitsumik ingerlanneqassasoq aalajangiisuusumut, maleruagassat atuuttut malillugit atuuttumut, tunngassutilittut isigineqarpoq. Ernumassuteqarneq piviusuusutut isigineqarpoq, taamaattumillu siunnersuummi immikkoortoq 2-mi allanngortitsisoqarpoq, tamatuma kingorna aatsitassanut ikummatissanullu inatsimmi § 3 a-mi, pinngortitaq avatangiisillu pillugit apeqqutinik arlaannaannulluunniit attuumassuteqanngitsumik sularinnittarneq pillugu, aalajangersakkanik ilanngussisoqarluni.”

TIG naleqquttunik innuttaasunillu peqataatitsinerunissamik apeqqutinik pingaarutilinnik imaqqartunik tusarniaanermi akissutaat imaqqarpoq, Inuussutissarsiornermut, Aatsitassanut, Nukissiutitut, Inatsisinut Atuutsitsinermit Naligiissitaanermullu Naalackersuisoqarfiup tamanna siunnersuummi akissuteqaatinut immikkoortumi akilluarsinnaasimagaluarpaa.

Sulisitsisut (GE) siunnersuut tamaat isigalugu pitsaasumik tiguaat, kisiannili GE-p kaammattuutigaa immikkut ersarissarlugit ernumassutaasinnaasuni aalajangiinerit akuersissutillu pillugit allaffissornikkut misilerarnissaasa eqqunneqarnissaat, naammagittaalliornissamummi inatsisitigut aalajangerneqarsimasumut pioreersumut peersitsinissaq pineqarmat. Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup tassunga atatillugu oqaatigaa:

*"Nassuiaatini nalinginnaasuni oqaatigineqartutut, aalajangiinerup suliarineqarnerata qaqqeqinneqarnissaannik Naalakkersuisut qinnuigineqarsinnaasussaapput. Nutaamik suliarinninnissaq inatsimmi aalajangersagaasoq Kalaallit Nunaanni inatsisini atorneqanngilaq, taamaattumillu siunnersuummi allanngortitsisoqanngilaq."*

### **Siunissami Aatsitassanut immikkoortorta qarfissaq pillugu ilisimatitsineq**

Inuussutissarsiornermut, Aatsitassanut, Nukissiutinut, Inatsisinut Atuutsitsinermit Naligiissitaanermullu Naalakkersuisoqarfik allannguutissatut siunnersuummut atatillugu, ilanngussaq 1 naapertorlugu, nunatsinni siunissami aatsitassanut immikkoortorta qarfissaq pillugu ataatsimiititaliamut ilisimatitsissummik ulloq 20. oktober 2025 nassiussaqarpoq.

2025-mi aningaasanut inatsimmut oqaasertaliussami periarfissiissut atorlugu, Aatsitassanut Ikummatissanullu Aqutsisoqarfik ulloq 1. juli 2025 atorunnaarsinneqarpoq, taannalu aningaasanut inatsimmi 2025-meersumi oqaasertaliussami tunngavigineqartoq Naalakkersuisoqarfiup oqaatigaa:

*"Aatsitassanut suliaassarfimmi, Inuussutissarsiornermut, Niuernermit, Aatsitassanut, Inatsisit Atuutsinneqarnerannut Naligiissitaanermullu Naalakkersuisoqarfimmit aamma Aatsitassanut Ikummatissanullu Aqutsisoqarfimmit isumagineqartumi, oqartussat suliarinnittarnerannik allatut ilusiliinissamut oqaasertaliussaq periarfissiivoq. Oqaasertaliussaq avatangiisinut suliaassarfimmi oqartussat suliarinnittarnerannut tunngatillugu naalakkersuinermit attuumassuteqannginnermit tunngaviusup allanngortinnissaanut periarfissiinngilaq, taamatullu avatangiisinut suliaassarfiup iluani oqartussap ilusiligaanerani allanngortinneqarnissaanut, tamatuma kingorna aatsitassat pillugit ingerlatallu tamatumunnga pingaarutillit pillugit inatsisartut inatsisaata (aatsitassanut ikummatissanullu inatsit) aammalu aatsitassamut tunngasunik allanngortinneqarnissaa, pisariaqarpoq."*

Aatsitassanut Ikummatissanullu Aqutsisoqarfiup atorunnaarsinneqarneranut ilutigalugu aatsitassanut ikummatissanullu aqutsisoqarfiup ilisimatitsissut malillugu suliaasat Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfimmut nuuppai. Aatsitassanut Ikummatissanullu

Aqutsisoqarfimmiit maannamut aalajangerneqarsimasut Aatsitassanut Ikummatissanullu Aqutsisoqarfiup matuneratigut allaffissornikkut naammagittaalliutigineqarsinnaajunnaassapput.

Ilisimatitsissummi takuneqarsinnaavoq 1. juli 2025 tikillugu Aatsitassanut Ikummatissanullu Aqutsisoqarfimmi amerlanerpaat suliassat aallartinneqarsimasut, Aatsitassanut Ikummatissanullu Aqutsisoqarfiup kingorna aatsitassanut immikkoortortaqrifiit allat ikiorsiuttarsimagai takuneqarsinnaavoq, uani aamma ilaapput avatangiisinut atugassarititaasut Miljøstyrelsemit aalajangersarneqarsimasut. Inuussutissarsiornermut, Aatsitassanut, Nukissiutinut, Inatsisinut Atuutsitsinermit Naligiissitaanermullu Naalackersuisoqarfiup Aatsitassanut Aqutsisoqarfik kingorna nammineerluni aalajangiingikkuni nammineerluni aalajangiiffissamik innersuussutissamik suliaqartarpoq.

Aatsitassanut Ikummatissanullu Aqutsisoqarfiup naliginnaasumik suliat imaattut kisiisa aalajangiiffigisarpai:

- Arsaarinninnerit
- Avammut tunisinissamut akuersissutit
- Suliniuteqarnissamut akuersissutit
- Misissuinermit aningaasartuutunik akuersissuteqarneq
- Ilisimatusarnermut atasumik misissuinissanut akuersissutit

Aatsitassanut Ikummatissanullu Aqutsisoqarfiup suliassat allat aalajangiiffigisarsimangikkai aamma takuneqarsinnaavoq. Aatsitassanut Ikummatissanullu Aqutsisoqarfik Inuussutissarsiornermut, Aatsitassanut, Nukissiutinut, Inatsisinut Atuutsitsinermit Naligiissitaanermullu Naalackersuisoqarfiup aalajangiiffigisassaani taarsiullugu innersuussummik suliaqartarpoq. Aqutsisut politikikkut piginnaatitsissuteqarput aalajangiiffigisassat suliani tamakkunani allaffissornikkut immikkoortortaqrifinnut suliakkiutigineqarsimangitsuni, taarsiullugulu immikkoortortaqrifimmit aalajangerneqarsinnaasumi. Tassunga atatillugu Naalackersuisoqarfik tassunga uparuaavoq suliat eqqartortillugit avatangiisinut sivisuumik annertuumillu sunniuteqarsinnaasuni aamma inuiaqatigiinnut tunngatillugu, iluaqutitaqarsinnaavoq allaffissornikkut aalajangiisoqanngippat.

Aatsitassanut Ikummatissanullu Aqutsisoqarfiup matuneqarnera ataqatigiissaarilluni sulinermi isumalluutunik atuinermik annikinnerulerneranik malitseqarsimasoq Naalackersuisoqarfiup ilisimatitsissutitut oqaatigaat.

**Ataatsimiititaliap siunnersuutit pillugit Naalackersuisunut apeqqtai**

Ataatsimiititaliaq siunnersuutitut suliarinninnerminut atatillugu Inuussutissarsiornermut, Aatsitassanut, Nukissiutitut, Inatsisinut Atuutsitsinermit Naligiissitaanermullu Naalackersuisoqarfimmut ilanngussaq 2 malillugu apeqquilliissuteqarpoq.

Akissut malillugu Aatsitassanut Ikummatissanullu Aqutsisoqarfik atorunnaarsinneqarpat inatsisitigut tunngaveqartumik aalajangiinnermit naammagittaalliorsinnaanermut annaasaqartussat ukuupput:

- Toqqaannartumik piginnaatitsissummik pigisaqartut.
- Peqatigiiffiit aamma kattuffiit, malittarisassatik malillugit sukisaarsarneq, avatangiisini pinngortitamilu soqutigisat imaluunniit inuiaqatigiinnut tunngasut pillugit soqutigisanik annertuunik isumaginninnissamut siunertaqartut.
- Aatsitassanut ikummatissanullu inatsit naapertorlugu kikkut tamarmik, suliap pineqartup kinguneqarnissaanik pingaarutilimmik inuttut namminertut soqutigisaqartutut naatsorsuutigineqarsinnaasut.
- Tamatuma saniatigut nalinginnaasumik qulliuernerusumut naammagittaalliorsinnaaneq, taanna malillugu inatsisit allat malillugit aalajangiinnermut, assersuutigalugu allagaatinik takunninnissamut aalajangiinerit, tunngatillugu oqartussamut qulliuernerusumut naammagittaalliorsinnaanera, atorunnaarpoq.

Apeqqu 2 aamma 3 naapertorlugu, pinngortitamut avatangiisinullu tunngasut pillugit pisortat ingerlatsinerannik allatut aaqquissuussisoqassappat, tamanna naammagittaalliorsinnaatitaasut imaluunniit naammagittaalliorsinnaanermut atugassarititaasut annikillisinneqarneranik malitseqassanngitsut akissuteqaammi ilanngullugu uppersarsarneqarpoq.

### **Siunnersuutit aningaasatigut kingunerisassai**

Inatsisissatut siunnersuutip immikkoortoq nalinginnaasoq malillugu, siunnersuut aatsitassanut immikkoortortaqarfimmi allaffissornikkut annikillisaataasussaasoq naatsorsuutigineqarpoq, taamaalilluni aningaasatigut sipaaruteqarsinnaanermik periarfissaqartoq ilanngunneqarluni. Sipaaruteqarsinnaanerup annertussusissaa maannakkuugallartoq nalilerneqarsinnaanngilaq apeqquammammi siumut isigisumik qanoq allaffissornerup ingerlanneqarnissaa toqqarneqassanersoq. Sipaaruteqarsinnaanerli anikitsunnguussaaq allaffissornerup annertunerpaartaa sulianut ataasiakkaanut akuersissuteqartunut pisortanit akiliutinik utertitsinermit aningaasalersorneqartarmata.

Aatsitassanut Ikummatissanullu Aqutsisoqarfiup matuneqarnerata ataqatigiissaartumik sulinermi isumalluutinik atuinerup annikillisinneqarnissaanik nassataqartoq naliliiffigineqarpoq, ilanngussaq 1 naapertorlugu, tamanna Naalackersuisoqarfiup nalunaarutigalugu ilisimatitsissutigaa. Sipaarutaasut taakku qanoq annertutigineri pillugit ilisimatitsineq annertunerusumik imaqqanngilaq.

### **Ataatsimiititaliap siunnersuutininut oqaaseqaatai**

#### Aatsitassanut Ikummatissanullu Aqutsisoqarfiup matuneqarnera

Ataatsimiititaliap siunnersuutit siunertai pitsaasutut isigai aatsitassanummi immikkoortortaqaarfimmi allaffissornikkut eqaallisaanissamik periarfissiimmata, tamannalu pingaaruteqarluinnarpoq immikkoortortaqaarfik eqaatsumik sapinngisaq tamaat ingerlasinnaaguni, ilutigalugulu immikkoortortaqaarfiup nunatsinni pissutsinnut tulluarsarneqarnissaa qularnaarneqassammat.

Namminersorlutik Oqartussat Aatsitassanut periusissiaat 2025-2029 siunnersuummi malinneqartoq ataatsimiititaliap paasivaa, tassani aatsitassanut allaffissornerup (naalackersuisoqarfiit aqutsisoqarfiillu) aaqqissuusaanikkut sannaq ilanngullugu ukkatarineqarsimasoq takuneqarsinnaammat aamma aaqqissuusaanerup sannaanik nutaamik atuutsitsilersinnaaneq periarfissaammat 2.13 naapertorlugu ilanngullugu sammineqassalluni.

Tusarniaanermi akissutit tiguneqarsimasut qiviariaraanni tusarniaavigineqarsimasut tamaat isigalugu iluserisassatut siunnersuutigineqartumi malinnittutut isikkoqartut ataatsimiititaliap paasivaa, tassani Aatsitassanut Ikummatissanullu Aqutsisoqarfiimmi aalajangerneqarsimasunut naammagittaalliorsinnaanermut periarfissaq peerneqarsimasoq ilanngullugu.

Inatsit atuuttoq naapertorlugu naammagittaalliorsinnaannginnerat assersuutigaluguli kommuninilu peqatigiiffiit avatangiisinut siunertaqanngitsunut kommunillu ilaalu ilanngullugit naammagittaalliorsinnaajunnaarnerat uparuassallugu pingaaruteqartoq ataatsimiititaliaq isumaqarpoq.

Inatsisissatut siunnersuutip imikkoortui pingaarnerit qimerlooriaraanni oqaaseqaatini naliginnaasuni takuneqarsinnaapput:

*”Akuersissutit akuersissuteqarnerillu pillugit aalajangiinernut maannamut Aatsitassanut Ikummatissanullu Aqutsisoqarfiimmit aalajangiiffigineqartartunut tunngatillugu naammagittaalliorsinnaanerup peerneqarnera ajornartorsiutitaqanngitsutut isigineqarpoq, tassami misilittakkat takutippaat qinnuteqartut aammalu akuersissutit Inatsisartut inatsisaanni pineqartunut ilaasut malillugit pisinnaatitsisummik pigisaqartut kisimik naammagittaalliorsinnaaneq taanna atortaraat, taakkualu aalajangiinerup suliarineqarnerata qaqeqqinnissaa pillugu Naalackersuisut qinnuiginissaannut suli periarfissaqartussaapput.”*

Aatsitassanut tunngasut suli ineriartormata kingunerisassai naliginnaasuusut ataatsimiititaliap nalilerpaa.

Ataatsimiititaliamit tikkuarumaneqarpoq aalajangiinermik suliap nanginneqarnera tassaangimmat naammagittaalliorsinnaanermut aqut inatsisitigut aalajangersagaq. Assersuutigalugu aalajangiisoqareerneratigut paasissutissat nutaat saqqummiunneqarnissaat qaqqitseqqinnermi naliginnaasumik piumasagaataavoq, tamannalu pisinnaatitaaffimmut tunngassuteqanngilaq.

Avatangiisinut Aqutsisoqarfimmut tunngatillugu pissutsit

Pinngortitamut avatangiisinullu tunngasunut pitsaassutsip ajorseriannginnissaat aalajangiisuusooq ataatsimiititaliaq isumaqarpoq. Avatangiisinut Aqutsisoqarfik matuneqarnissaa toqqarneqassagaluarpat aqutsinikkut suliarinnermut namminermut tunngatillugu pinngortitamut avatangiisinullu tunngasuni pitsaassutsip ajorseriannginnissaata qulakkeerneqarnissaanut naleqquttumik naapertuuttumillu Naalakkersuinikkut akuliuttannginnissamik tunngavik atuuffia siunnersuummi § 3 a-mut tunngassuteqarpoq.

Pinngortitamut avatangiisinullu tunngasut aalajangiiffiqarsimasut pillugit naammagittaalliorsinnaanermut aalajangersagaq naatsuararsuavoq, siunnersuummi § 3 b naapertorlugu, taamaallaammi tunngaviatigut oqaatigineqarmat pinngortitamut avatangiisinullu tunngasut pillugit aalajangiinerit naammagittaalliuutigineqarsinnaanerat pillugu Naalakkersuisut aalajangersaasinnaasut taamaallaat oqaatigineqarmat. Kisianni aalajangersakkami oqaaseqaatiniluunniit ersarissumik naammagittaalliornissaq allaaserineqarsimanngilaq.

Pinngortitamut avatangiisinullu tunngatillugu Avatangiisinut Aqutsisoqarfik piffissap ingerlanerani matuneqassagaluarpat naammagittaalliorsinnaanermut periarfissami pitsaassutsip assigisaasalu ajornerulersinneqannginnissaat pillugu ataatsimiititaliap apeqquaqqaataannut Naalakkersuisut akissuteqaataanni uppernarsarneqartoq ataatsimiititaliap maluginiarpaa.

Pinngortitaq Avatangiisillu pillugit aaqqissuusseqqittoqassagaluarpat ammasumik ingerlanneqartarnissaat, Naalakkersuisullu Inatsisartuni ataatsimiititalianut attuumassuteqartunut piffissaalluarallartillugu ilisimatitsissuteqartarnissaat ilanngullugu ataatsimiititaliap naqissuserpaa.

**Ataatsimiititaliap inassuteqaatai**

Ataatsimiititaliami amerlanerussuteqartut Inuit Ataqaatigiinniit, Demokraatiniit Siumumiillu siunnersuut akuerineqartussanngorlugu innersuussutigineqarpoq.

Naleraq ataatsimiititaliami ikinnerussuteqarlutik imaattumik oqaaseqaateqarput:

“Naleqqamiit akuerineqarsinnaanngitsutut isigaarput Naalackersuisut Aatsitassanut aammalu Avatangiisinut Aqutsisoqarfiit atuuttuarnissaannut inatsisitigut tunngaviusut atorunnaarsinniarmatikkit.

Taakkua oqartussaasuupput pingaarutillit arlaannaannulluunniit attuumassuteqanngitsut, nunanilu aatsitassarsiorfiusuni aaqqissuussaalluurtuni nalinginnaasumik atuuttut. Naalackersuisut suliassaqarfimmik taama pingaaruteqartigisumik qitiusumiit ingerlatsilernissaat qulaaniillu aqunnissaat isornartorsiorneqartariaqarpoq, aammalu pisortat aningaasatigut sipaaruteqarsinnaanerat oqaatigineqanngitsoq eqqaaneqartariaqarpoq.

Naalackersuisut oqartussaasut pingaarutillit politikkikkut attuumassuteqanngitsut atorunnaarsinniarpaat, taamaalillutillu aatsitassarsiorneq Inuussutissarsiornermut, Aatsitassanut, Nukissiuuteqarnermut, Inatsisinik atuutsitsinermut Naligiissitaanermullu Naalackersuisup toqqaannartumik aqutsilernissaa qulakkeerlugu. Taamaaliornermikkullu aqutsisoqarfinnut aningaasat qulakkeernikut nammineq ingerlatilertussaallugit.

Oqartussaaffeqarfiit politikkikkut attuumassuteqanngitsut qitiusumiit ingerlanneqalernissaat akuerinngilarput, politikikkummi attuumannginnissaat pingaaruteqaraluaqigami.

Aammattaaq isornartorsiorariaqarparput aatsitassanut inatsit allanngortinniarlugu aalajangertoqaraluartoq, aatsitassarsiornermut inatsisip kalaallinut pitsanngorsaalluni allanguuteqarsinnaanera eqqarsaatigineqanngimmat. Taamaaliornikkummi Kalaallit Nunaanni aatsitassarsioqatigiiffinni piginneqataanissamat ineriartortitsinissamullu kalaallit pitsaanerusumik atugaqarnissaat qulakkeerneqarsinnaagaluarimat.

Taamaattumik Naleqqamiit siunnersuutip itigartinneqarnissaa innersuussutigaarput.”

Taama oqaaseqarluni isumaliutissiissummut allassimasutut paasinnilluni ataatsimiititaliap siunnersuut aappassaaniigassanngortippaa.

---

Mariane Paviasen Jensen  
Siulittaasoq

---

Juno Berthelsen  
Siulittaasup tullia

---

Lars Poulsen

---

Aqqalu C. Jerimiassen

---

Hans-Erik Enoksen

---

UPA/2026.

J.nr.: 01.36.03.03-00025

J.nr.: 01.25.01/24FM-LABU-00025